

Gyaez De Couh Lai Buenx De Di

爱她就多陪陪她

□ Moz Liujgvei / 莫柳桂

Geij bi gonq, buz dinga lij ndei seiz, ciengzseiz youq haetromh roxnaeuz banhaemh ndit mbouj caengz ndat seiz bae ndoengfaex caeuq ndoeng faexndoeq liz ranz mbouj gyae baet gij mbawfaex doek daeuj coemh, roxnaeuz gip gij nye faex reuq daj gwnz gofaex doek roengz daeuj, euj baenz diuz saek 30 leizmeix raez, caiq yungh caghaz cug ndei, menhmenh beng dauq ranz. Geij bi neix buz itcig coemh gij fwnz gag gip, hoeng de gvaqseiq seiz, gij fwnz lij lw cix vanzlij doi rim byongh fungh ranzcawj.

Goeng gou lij lix seiz, gyaez ciengx roegdoxgap, de youq laj yiemhranz guh aen laeuzbenj genjdanh ndeu, ndawde ciengx miz geijcib duz roegdoxgap. Goeng caeuq buz song vunz vihliux geijcib duz roegdoxgap haenx, muengz hwnj muengz roengz. Goeng gvaqseiq le, boh gou roxnyinh buz gag boux vunz ndeu ciengx roegdoxgap saedcaih dwg yungyiemj, couh guh aen rungzaeq ndeu nda youq rog dou daeuj hawj buz ciengx duzgaeq. Moix ngoenz haetromh, buz hwnqdaej le daih' it gienh saeh couhwdg hai rungzaeq, langh gyoengq duzgaeq ok rog bae ra gwn, daengz banhaemh, de youh muengz dwk geq yawj gyoengq duzgaeq cienzbouh dauq ranz caengz, geq gaeuq lo caiq gueng. Geij duz gaeq buz ciengx gig miz rengzlix, cungj diuq gvaq gaiq humx, daengx ranz daengx gyanghough luenh buet luenh okhaex, meh gou yawjraen roxnaeuz caij deng haexgaeq, caen dwg simnyap raixcaix, de gaenq naeuz boh gou gaej hawj buz ciengx duzgaeq, hoeng, boh gou mbouj doengzeiq. Boh gou naeuz, buz seizneix cij miz di saeh gaijmbwq, caemhcaiq buz geq lo, mbouj rox seizlawz goulau youq ninz seiz couh gvaqseiq lo, seizneix moix ngoenz haetromh hwnqdaej yawjraen aen rungzaeq buz gaenq hai, gyoengq duzgaeq youq baihrog luenh buet,

couh rox buz ngoenzneix hwnq ndaej mbonq lo, ndawsim hix an' onj. Bouxlawz siengj daengz, bi' gvaq boux guhcaeg ndeu caeg duzgaeq buz liux bae, gij gyaeq henz rungzaeq hix deng bouxcaeag swnhfwngz caeg caez. Vih gienh saeh neix, buz ndatheiq song ndwen, youq ndaw mbanj bungz raen bouxlawz cungj yunghrengz ndaq boux guhcaeg haenx. Doeklaeng, aenvih buz ndang hix yied daeuj yied mbouj ndei, boh gou couh mbouj caiq bang de cawx duzgaeqlwg daeuj hawj de ciengx lo.

Bineix cietcieng, ndang buz lij genqmaenh, sing sang ndaej vunz youq dieg ngeih samcib mij gyae hix dingq ndaej nyi, gyanghaemh gwn caeuz liux de lij buenx gou sousib ranzcawj, caeuq gou gangjgoj daengz cib' it ngeih diemj cungj cij habhoz dwk bae ninz. Gij saeh ceiq hawj dou cuengqsim, dwg buz moix donq cungj gwn ndaej vanj haeux ndeu, vanj noh caeuq byaekheu ndeu. Vunzgeq lij gwn ndaej, couh lij miz maqmuengh. Hoeng, baez gvaq cietcingmingz, buz sawqmwh byaij mbouj ndaej lo, gwn haeux ok haex ok nyoh cungj youq gwnz mbonq. Bohlungzlaux gyangngoenz daeuj ciuqgoq buz, gyanghaemh dwg bohmeuh gou daeuj ciuqgoq. Seizneix buz mizseiz luenh hat vunz, hoeng, hat sat youh caeuq vunz deng hat boizlaex, gangj bonjfaenh mbouj miz yungh, seizneix couhwdg baengh gyoengq lwnyiez. 5 nyied seiz, ndawsim buz yied daeuj yied mbouj an' onj, cungj mbouj hawj bohlungzlaux caeuq bohmeuh lizhai henz ndang de, lij ciengzseiz heuh naeuz: "Gyoengq sou umjumj gou ba". Haemhgonq yaek gvaqseiq, buz sawqmwh cam dahcej daeuj buenx haenx: "Mwngz gangj vihmaz Dahgvei ranz gou mbouj dauq ranz yawj gou ne". Buz gvaqseiq le gou cij dauq ranz, dingqnyi dahcej lwnh coenz vah

neix, nyaenx mbouj ndaej laeglemx daej lo. Haujlai vunz cungj gangj, buz lix daengz goujcib lai bi, lwg, lan, laenj hauqswnh, ndwenngoenz cwxcaih, seizneix buz gvaqseiq le, ciuh neix de gvaq ndaej ndei lo, gaej daej, hawj de ndeindei bae lajyaem.

Hoeng, gou baez siengj daengz buz yaek gvaqseiq seiz gij vah de gangj, raemxda couh gag doek roengzdaej. Geij bi neix moix baez dauq ranz, gou cungj buenx buz gangjgoj, gangj gij saeh gaxgonq, cam de gij doxgaiq bouxcoz seizneix gaenq mbouj rox hix mbouj roxyiuj baenzlawz yungh Vahcuengh bonjdeih daeuj gangj haenx, moix baez de cungj angqvauvau, dinfwngz caez ning dwk caeuq gou gangj gij saeh caeuq doxgaiq. De geq lo, ndaejgeiq dauqdaej miz di luenh, gou caeuq dahnuegx mboujlwnh bouxlawz dauq ranz, vunzranznden cam, buz cungj dap: "Dwg Dahgvei gou dauq ranz lo". Baeznaengz caeuq buz gangjgoj, aen goj ndeu de caj yaep ndeu youh raemh naeuz. Bineix cietcieng lizhai ranz dauq Namzningz, buz baez yawjraen gou hwnj ci couh youh daej youh nauh, mbouj nyienh hawj gou lizhai, mbouj dwg, wnggai dwg de mbouj nyienh gyoengq lwnyiez lizhai henz ndang de. Ngux nyied co' ngux aenvih lij miz hong yaek guh, gou mbouj ndaej dauq ranz, nyuenz dajsuenq bet nyied cibhaj dauq ranz, swnhbienh youq ndaw rug buz an aen densi ndeu, boq di denyingi yungh Vahcuengh boiq yaem ndeu hawj de yawj daeuj gaijmbwq. Bouxlawz siengj daengz, buz caj mbouj daengz couh gvaqseiq lo, seizneix maz dajsuenq cungj mbouj miz banhlap saedyienh lo.

Buz gvaqseiq le, gou itcig siengj, danghnaeuz goeng lij lix, ndaej buenx buz daengz seizneix, buz dwg mbouj dwg couh mbouj lumj yienghneix gadog ne? Gyoengq lwnyiez majhung,

aeu nyaengq ra gwn, aeu lizhai ranzmbanj bae guh hong, caemhcaiq lwnyiez baenzlawz gvansim buz hix cungj beij mbouj hwnj bouxgvan gyaez youq henz ndang doxceng doxnauh, boux ndeu liz mbouj ndaej boux ndeu. "Gvanbaz coz, daengz geq daeuj doxbuenx" coenz vah neix gou lij iq seiz doeg daengz, cungj roxnyinh coenz vah neix gangj ndaej gvaqmauh lai, baenzvunz lo caiq doeg, miz cungj ganjdan vah rim dungx cix gangj mbouj ok saek coenz ndeu. Gij bi goeng mbouj youq henz ndang buz haenx, buz caeuq bouxlawz gangj vah caensim? Gij gyanghaemh aenvih geq le ninz mbouj ndaek haenx, buz youh maqmuengh bouxlawz youq henz ndang? Hoeng, gij vwndiz neix mbouj rox bae cam bouxlawz aeu dapanq lo.

Seizgan lumj naq, baez yaep da couh gvaq gig vaiq, sojmiz raemxlangh sang dauqdaej rox bienq bingz, sojmiz siengjniemh baihrog dauqdaej rox yo youq ndawsim. Hoeng, gou seizneix baez ngeix daengz banhaemh seiz, buz gou gag naengh youq gwnz daenggeij rog dou ranzcawj coh laj loh hung muenghyawj, saeknaj de gadog dangqmaz; ngeix daengz moix baez gou dauq ranz, gou daengz gizlawz buz couh riengzlaeng daengz gizlawz, raemxda nyaenx mbouj ndaej couh doek roengzdaej lo. Danghnaeuz seizgan ndaej dauq daengz doenghbaez, gou itdingh cuengq roengz gij saeh gwnz hong, lai dauq ranz, lai buenx buz gou di. Hoeng, saehcingz lajmbwn couh lumj yienghneix, mbouj miz yw ienqhoij daeuj gwn. Cij maqmuengh buz caeuq goeng gou youq lajyaem, sojmiz cungj ndei, hix maqmuengh gyoengq buz lij lix youq lajmbwn, vunz ndawranz lai buenx gyoengqde di, mbouj hawj gyoengqde roxnyinh gadog.

(sat)

Heiqyungh Hom Yinhsaw

鬃剧流书韵

□ Luz Siucunh / 陆秀春

Bonj saw 《Heiqiaux Yunghcouh——Heiqyungh》 ginggvaq bouxswnjcienz Heiqyungh Hungz Giz caeuq lauxhangz Heiqyungh Hungz Yi habrengz sai 3 bi sij baenz, youq bi 2015 ndwen 12 youz Guengjsae Minzcuz Cuzbanjse okbanj. Bonj saw neix miz sam aen yiyi "guckgya gaep": Hanghmoeg guckgya feih vuzciz vwnzva yizcanj, bouxswnjcienz guckgya gaep sij caeuq guckgya okbanj gihginh haeujoengh.

Bonj saw miz 92 fanh cih,

bouxswj dwg gij lwg Hungz Gauhmingz, de dwg donzcanj boux daih' it Donzheiqyungh. Gyoengqde daj gokdoh boux caenndang ginglig, youq ndaw saw yienh' ok gij sojmiz Heiqyungh——lizsij goekgaen, boux vunz biujyienj, gijvah heiqdaiz, gij ciengqfap caeuq yinhyoz, najveh, buhvaq, daizheiq diuhdoh, laeng daizheiq hangzdaeuz, heiqmoeg gizleij daengj, hawj bonj saw neix miz cungj feihdauh nanwt, sohseid caeuq caenciet.

Heiqyungh dwg heiq deihfueg bizvangz aeu "Vahgun Yunghcouh" daeuj yienj, cij Namzningz miz, daengz seizneix miz saek 200 bi lo, lumj denyingi vujcaz nei ciengzgingj doxhoenx lai, nauhyied dangqmaz, youq ndaw fazcanj youh supsou haujlai Vahcuengh, gojgaeq Mbanjcuengh, gij yenzsu vwnzva Heiqcuengh, miz daegsaek digih caeuq daegdiemj saujsaq minzcuz, youq bi 2008 ndaej lied haeuj 《Bih Daihngieih Guekgya Feih Vuzciz Vwnzva Yizcanj Mingzloeg》.

Daizheiq rwenzyiengj hom yinhsaw, cienz daengz seizneix louz sug laux. Yawj bonj saw neix, mboujdan rox Heiqyungh dwg maz, engq doenggvaq Heiqyungh rox ndaej cungj vwnzva, duenh lizsij caeuq faenh cingznaek baihlaeng de.



Dahsau Yauzcuz cang huqngaenz.